

**KUMPUNAN**  
RAM LEH HNAM  
HUMHALH

# YMA AW



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO.36 8<sup>th</sup> September 2013

## Intihsiakna chi hrang pahnihah Branch-in lawmman a dawng

Chanmari West, 8<sup>th</sup> September, 2013 : Tunkar chhunga Central YMA-in intihsiakna a buatsaih chi hnih - Arm Wrestling leh Cultural Dance Competition-ah Chanmari West Branch YMA chuan Lawmman ropui tak a dawng ve ve.

1<sup>st</sup> Inter-Branch YMA Arm Wrestling Champoinship-2013 September ni 3 leh ni 4-a Ramhlun Indoor Stadium-a neih zawh takah Chanmari West Branch a<sup>ang</sup>in mipa 7 leh hmeichhia 2 an tel.

Hmeichhia weight category pali then zingah 65 Kg above ah Juliet Lalengkimi V-Sect chuan Gold medal lain category hrang hrang palia Champion theuh te'n chak ber zawng lehin Juliet Lalengkimi chuan chak ber pahnihna a hauh leh a ni.

Mipaah Laltharlana K-Sect-chuan 65 Kg below-ah Bronze medal a la bawk. Chanmari West Branch YMA aiawha medal late leh tel zawng zawngte chungah Branch YMA-in lawmthu a sawi tak meuh.

Chief Ministers' Running Trophy in YMA Cultural Dance Competition-2013, September ni 5 leh ni 6 a neih zawh takah Chanmari West Branch-in lam thiam ber lawmman pahnihna a dawng bawk.

Sept ni 5 leh ni 6-a Chief Ministers' Running Trophy in YMA Cultural Dance Competition, Hawla Indoor Stadium, Republic Vengthlanga neih zawh tak result

chu hetiang hi a ni.

Cheraw	1	Ramthar North
	2	Vaivakawn
	3	Chanmari
Khuallam	1	Chanmari West
	2	Ramhlun South
	3	Vaivakawn
Chai	1	Ramthar North
	2	Mission Vengthlang
	3	Armed Veng

Heng items pathuma intihsiakna a<sup>ang</sup>anga point hmuhte hi belhkhawm niin, a pumpuia result chu hetiang hi a ni.

- 1 Ramthar North Branch
- 2 Chanmari West Branch
- 3 Chanmari Branch

He intihsiakah hian YMA Branch 42 an tel. Chanmari West Branch YMA tan hian member 62 lamin, lam tam ber lawmman Art & Culture Director Award an dawng bawk.

He hnam lam intihsiak leh Arm Wrestling-a Branch aiawha tel leh lawmman latute zawng zawng chungah te, a tul anga zirtirtute leh a buaipuitute chungah Branch chuan thinlung takin lawmthu a sawi a ni.

### Branch News

Ni 10.9.2013 (Thawhle) hian rokhawlhna a awm loh chuan Branch Executive meeting koh tum a ni.

Executive member Pu Lalchhanhima Silchar leh Mamita zin pawh dam takin a lo haw leh ta.

11<sup>th</sup> Chief Ministers' Running Trophy in YMA Cultural Dance Competition - 2013 September ni 5 leh ni 6 a Hawla Indoor Stadium Republic Vengthlanga neih zawh taka lawmman pahnihna dawn a nih theih nana Branch aiawha lam entirtu member-te, lam zir chhung zawnga tha leh zung sengtu zawng zawngte leh intihsiak nia lirthei thawh chhuahpuitu zawng zawngte chungah Branch YMA-in lawmthu a sawi.

Lam zir nana Indoor Stadium hmantirtu Indoor Stadium Management Committee, lam zirte riah nana Middle School hmantirtu Headmaster leh Staff leh tui petu PHE Department hotute chungah Branch YMA-in lawmthu a sawi tak zet.

Vengchhunga chhiattawk an awmin member-te fan la thar zual deuh deuh turin Branch YMA-in a ngen.

### DRESS THEH LUH TUR

Sept ni 5 leh ni 6-a CM Running Trophy (Hnam Lam intihsiak) neih zawh taka Art & Culture Dept leh ZOFA Cultural Club thawmhnaw hmanngu zawng zawngte'n fai taka suin ni 8.9.2013 (Pathianni) ral hma ngeiin Pu RL Thanhnuna, Branch Asst. Secy hnenah kim taka theh luh vek tur a ni e.



### TUNKAR CHANGVAWN

Hmuh awla a awm lai hian Lalpa chu zawng ula, a hnaih lai hian ko rawh u; mi suaksual chuan a awm dan chu bansan sela, mi fel lo chuan a ngaihtuhte chu bansan bawk rawh se; Lalpa hnenah kir leh rawh se.

Isaia 55:6&7



Hnam Lam intihsiakna Lawmman 2-na latute

**Editorial Board**

<b>Editor:</b>	RLalringheta	9862358337
<b>Joint Editor :</b>	Lalchhandama	9862358347
	JLalnangliana	9862399658
<b>News Editor :</b>	Thangkhuma	9862303135
	Lalchhuanmawia	9862580558
	KLalremtuanga	9862119608
<b>Cir.Manager :</b>	Jacob Lalrinsanga	9612319779
<b>Production Manager :</b>		
	RL Thanhmuna	9436152760

**Branch Office Bearer**

<b>President</b>	C Lalarliana	9436142049
<b>Vice President</b>	K Darthantluanga	9436196071
<b>Secretary</b>	Zairemmawia	9862385654
<b>Asst. Secretary</b>	RL Thanhnuna	9436152760
<b>Treasurer</b>	R. Lalmachhuana	9436151817
<b>Fin.Secretary</b>	Lalrinliana	9862581814
<b>Adviser-te :</b>	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

**Editorial :**

Tunkar chhunga kan Branch YMA hlawhtlinna hrang hrangte chu a ngaihnaawm a chhuanawm hle mai. "Damdawi an man, zu zuar an hnawt chhuak" tih lam ni lovin, intihsiakna beitunge hlawhtlinna thawmin kan veng a luah khat a, veng mi lo nih ve ngawt pawh thil nuam a tling awm e.

YMA leh Sorkar Dept hrang hrang tangkawpin intihsiakna a buatsaih fo tawh thin a, a la buatsaih zel pawh a rinawm. Heng intihsiakna hrang hranga kan veng sulhnute hi a zahpuiawm loh thin khawp mai. Kar khat chhungin intihsiakna chi hrang pahnihah Mizoram deng chhuak khawpin kan hming a tha a, hei hi hruaitute inpekna leh member-te thawhrimna vang liau liau a ni. Heng kan lawmman dawnah hian kan lawm thiam tur a ni a, chutih rual chuan hmasawn zel erawh kan tum a tha awm e.

Eng intihsiaknaah pawh lawmman dawng pha tur chuan inbuatsaihna tha a pawimawh. Arm Wrestling lama player-te inbuatsaihna mumal nei thei lovin lawmman an dawng a, an chhuanawm rualin tun aia sang thlang thei an ni tih erawh a chiang, a lehpekte a awm ngai anih chuan theih tawpa inbuatsaih a fuh awm e. Hnam lama telte an inbuatsaih nasa, tha leh zung, hun an pe a, an inpekna Pathianin mal a sawm a tih loh theih loh. Hruaitute thahnemngaihna a fakawm takzet baw. Hawh u, hmasawn zel turin theih tawp i chhuah tlang zel ang u.

**Article****KAN BRANCH YMA LO PIAN DAN**

R. Lalchhuanawma

Kum 1985 kum tharah Mizorama kohhran lian ber Presbyterian kohhran, Chanmari Biak ina inkhawm ho thin chu Chanmari Preaching Station, tuna YMA Park chhak, Pu Vanlalsawma kawtah hian inkhawm hnan a ni a, a kum lelah kohhran puitlinga hlankai niin, zawi zawiin tuna Biak in hmanlai mekah hian an insuan lut ta a.

Kum 1987 a lo inher chhuah meuh chuan Chanmari atangin veng hrang kan lo ni tain 'Chanmari West' tih a lo ni ta a, (*Vengdang tam takin an ngaihpawh thin 'Chanmari East' tih a awm hnan lo*) hemi kum hian Village Council hnan neiin V/C member turte pawh thlan nghal an ni a, chungte chu  
**President** :Pu K Thantluanga  
**Vice President** :Pu F Laltuala  
**Secretary** :Pu R Vanchhunga (L)  
**Members** :Pu Tlangramliana (L)  
 Pu Pu Ropianga (L) Pu B Savunga  
 Pu Rozinga, (*tunah chuan Chanmari Veng a ni tawh*) Pu R Thangdailova.  
**Nominated seat** : Pu Rongura (L)

Khatihlai khan tlak lampang zawng hi Chanmari West Area a ni a, hun kal zelah zawi zawiin ramri pawh siam danglam ni chho zelin tuna kan awm ang hi kan ni chho ta a, ramri depa awmte erawh chu an duhna zawk zawka lawi thei tura zalenna thui tak pek an ni.

Village Council hnan hial kan lo neih takah chuan khatih laia Chanmari Branch YMA Executive committee rilruah pawh 'YMA hi kan inthen ve tawh mai dawn lawm ni?' tih ngaihtuahna a lo awm faih faih a.

Zankhat chu (kum 1988 kum tawp lam niin ka hria, ka mitthlaah a la cham reng mai) Pu Hrangbana (L) fapa Malsawma hi Executive committee member a ni a, an In-a kan committee tumin AOB-ah Branch YMA inthen chungchang rawtna member thenkhat atangin a lo ri chhuak a. Pu CH Rosanga (RIP) lo dingin, thinrim hmeh teuh chungin "YMA Branch inthen chungchang hi a sawi pawh sawi ri tawh reng reng suh u....." a ti ta piap piap mai a, sawizui chiah ngai lovin

meeting Chairman-in a titawp zui ta nghal a, hun engemawchen chu Branch YMA inthen chungchang thu chu a reh zui ta vang vang a, khatih hunlaia Branch hruaitute khan Branch inthen kha kan hreh em atin ni.

Hun a lo kal zela, YMA pawh Branch pakhat a awm chho zel a, kha'ng hunlaia hruaitute khan hreh hle mah se kum 1989 kum tawp dawn lamah chuan "Chanmari Branch YMA hi Branch pahnih ah inthen nise, 'In dang' tih tawngkam hman miah loh tur a ni...." tiin hreh tak chungin Branch pahniha inthen thu chu lungrua taka passed a lo ni ta a.

Chanmari Branch YMA kha Section paliah then a ni a, kan Branch huamchhung hi Section pahnih niin Kawrpui chin chhimlam zawng hi Chawngbawla Section a ni a, hmar lam zawng hi Khuangchera Section a ni.

Kan Branch pahnih inthen chungchang kha tuna kan member tam zawk hian kan hre phak kher lo ang a, a'n ngaihnaawm mai mai khawp a. Executive committee meeting-ah bungraw insem dan tur chungchang ngaihtuah a lo tul a, vengchhak lama lawi tur ten 'vengthlang lam hi Branch thar chan chang tur an ni a, he'ng bungbel kan neih ang ang hi a tam zawk chang rawh se' an ti a, keini lam Pu T. Bualzika, Tv R. Lalmachhuana (Valtea) (*nupui la nei miao hek lo*) Pu Ramzauva te leh Pu Lianchhuna teho nen tawngrua in 'ni bik lo ve, a inzatin kan insem tur a ni' tiin kan tawng ve flat baw a, bungrua kan neih ang angte chu a inzatin kan hai then phawk a, a in zatin kan insem ta a. (*a tak takah chuan kan chan lam kha a tam zawk fein ka hria, Tv Lalzamlia Sailo te, Pu T. Lalhluna te leh Tv Zachungnunga teho khan kan chan lam kha a tlem ang tih hlau miao hek!!*) Tin, khawih chet theih loh (Im-moveable properties) chungchang kan ngaihtuah leh a. Khatih lai khan Pu Enga Sikul/Pu Hrangluaia Sikul (Chanmari P/S) kawmchhakah khian YMA Hall

phek 4-ah zawm a ni

**Chawngbawla Section**

□ Ni 4.9.2013 zan khan kuang duangin an hnatlang a, member thahnem tak an thawkchhuak a, Pi Rintluangi (RTS) in hnatlang thingpui leh a hmeh a siamsak a, phal taka Workshop hman tirtu Pu K Lalthakimate chhungkaw pahnih chungah lawmthu an sawi.

□ Pu K Lalthakimate chhungin an nau boral ta Lalrinawma hriatrenng nan tui chhawpna bottle 9 lai Branch kal tlangin a pe a, a chhinchhiahna siamsaktu Pu Lalnunthara Sailo te pahnih chungah lawmthu an sawi.

□ Pi Vanchhingpuii D/o Thanghrimi Aizawl Hospital a awm mek te, Pi Rebecca Lallianzuali W/o Dr R Vanlalchhuanawma Care Hospital a awm mek te, Pi C Lalawmpuii D/o C Rualkhuma New Life Hospital a awm mekte chu dam taka an chhuah leh thuai an duhsak hle.

□ Section huamchhungah Ran khuahkhirh tlat a ni a, chhungtinten zawm zel turin an ngen.

□ YMA Park-ah Lirthei dah khap a ni a, lo dah palhte chu dah tawh ngai lo turin an hriattir.

**Khuangchera Section**

□ Ni 7.9.2013 (Inrinni) zing khan YMA RUN-ah meeting a ni a, thu pawimawh tak tak an rel.

□ Chief Minister Running Trophy hnamlam intihsiakna kan Branch-in Pahnihna a hauh thei chu ropui an tiin Section atanga lam zawng zawngte an chhuang hle.

□ Chanmari West Presbyterian Kohhran Pavalai Camp-a Section member lut zawng zawngte harhtharna chang theuh turin duhsakna an hlan.

□ An hruaitu Ni K Vanlalchhuangi'n kawppui tur duhawm tak a hmu chu an lawmpui hle. An inneihna lawmpui tur hian hruaitu a tam thei ang ber kal turin an inchah.

□ An member Tv Laltharlina'n Inter Branch Arm Wrestling Competition-ah 65 kg below-a Bronze medal a dawng thei chu an lawmpuiin an chhuang hle.

**Neuva Section**

□ Tunkar hun remchangaah Committee neih a ni ang

□ Pu C Biakkhuma, Pi Zohmingthangi, Ni Lalmalsawmi (Sawmpuii) leh Tv K Zoramthara te damlo pawh an dam that leh

thuai an duh sak.

□ 11<sup>th</sup> Cheif Minister Running trophy a Branch YMA-in lawmman Pahnihna a la chu lawmawm an ti a, Veng aiawha lam zawng zawngte inpekna ropui an ti hle.

□ An hruaitu Pu HVL Zasanga leh Pu Lalzarzova te damlo pawh an dam tha leh tawh e.

□ Vawiin chawlhni tlai dar 3 hian Pasaltha Neuva Inah innghak khawmin hruaitute Duty tur a ni.

□ Chhungtinte Bawlhhlawh a bawm a paih theuh tur leh bawlhhlawh paih motor a paih theuh turin an inchah.

□ Chhungtinte mahni in leh a vel vawngfai theuh turin an in ngen.

**Taitesena Section**

□ Tunkar hun remchang hmasa berah meeting tum a ni.

□ An Secy Tv Lalbiaksanga damlo pawh a dam chhoh zel an duhsak takzet a ni.

□ Ni 1.9.2013 (Pathianni) khan section huamchhungah Duty a ni.

□ An section member Tv Numbers William Sawmpuia chu Comedian search 2013 a turu taka tel turin a inbuatsaih mek.

□ Silver Jubilee Fund pawh khawn chhoh mek a ni a, chhungtinte ngai pawimawh turin an inngen.

□ Section huamchhunga damlo mahni in lam a awm leh damdawi in lama awmte an dam leh thuai an duhsak hle.

□ An member Pu R Rohnuna chu Junior Administrative Grade-ah a kaisang a Deputy Secretary Minor Irrigation-ah dah a ni a, an lawmpui tak meuh a ni.

**Vanapa Section**

□ An hruaitu Tv R Lalrinngetha chuan Ni 13.9.2013 dar 11:00am hian nupui a nei dawn a, hruaitu te tawiamw theuh turin an in sawm a, hetiang dinhmun luah ve tur hian Tv. Hmingthana pawh an duh sak hle.

□ Ui leh Ar vulh te'n tha taka khuahkhirh turin an in hriattir leh.

□ Chhungtin te mahni In leh a vel vawngfai theuh turin an inngen nawn leh.

□ Pu Zairemthanga leh Tv Hmingthansanga te zin pawh dam taka an lo haw leh an beisei.

□ Pu Zairemthanga'n Thingpuiife chiaha tha tak a pe chu an lawm hle.

**✚ Kan Then Tak ✚****PI DENGCHUNGNUNGI**

Pa hming - Darhnuna (L), nu hming - Khuangnghilhlovi, Section-Vanapa, Kohhran-Presbyterian



Kum 1934-ah Khawbungah a lo piang a, pianpui mipa 5 leh hmeichhia 3 a nei. Kum 1957-ah Pu Saithuama nen inneiin fanu 1 leh fapa 6 leh tu 10 an nei. Kum 1978 ah Khawbung atangin Champhaiah an pem a, 1987-ah Champhai atang hian Chanmari West-ah lutin an inbengbel ta a ni. Pi Dengi hi nu zaidam leh nunnem, taima tak mai, thawh tur zawng reng mai a ni a. La deh thiam tak mai a ni. Kum 1974-ah Piantharna a chang a, tawngtai ngaina tak, Pathian faka zai leh lam nuam timi tak a ni. Kum 1977-a accident a tawh atangin insawisel neuh neuhna a nei fan a, Doctor hrang hrang anrawn kwal hnu pawhin hma a sawn thei meuh lo. Kumin June thla atang khan zunthlum a nei tih an hmuhchuah belh leh a, July thlaa an inentir leh chuan a lung atanga thisen pek chhuah chu a block tih hmuhchhuah a lo ni ta a, hei vang hian Aizawl Hospital-ah admit a ni a. Ni 1.9.2013 (Pathianni) khan a natna hi tuar lovin chatuan ram a lo pan ta a ni.

**PU HL ROZAMA**

Pa hming- Kaihuama (L), nu hming- Mangzakimi (L), Section-Vanapa, Kohhran-UPC (Mz).



Kum 1929, Dec ni 2-ah a lo piang a. Pianpui hmeichhia 2 leh mipa 2 a nei. Pu Rozama hi Manipur-a an awmlai chuan Council Chairman-te a lo ni tawh thin. Mizorama a awm hnuah pawh Church Board Chairman-te niin an lawina Kohhranah a theih ang tawkin a hun a hmang thin a ni. Pu Rozama hian Asthma natna a nei a, kar hmasa atang khan a natna hi zualin, ni 2.9.2013 khan damdawi inah an lut a, mahse beisei an neih vak loh avangin in lama enkawl mai turin an hawpui leh ta mai a ni. Tichuan ni 6.9.2013 (Zirtawp) khan a fate 7 leh a tu 13 te chu chatuan ram a lo pansan ta a ni.

*article chhunzawmna*

hmun tur lei laiin kan hnatlang thin a, tuna Chanmari YMA Hall hmun hi an/kan la nei lo va. Committee chuan lungual takin, initsikna leh inthikna tel hauh lovin tuna kan YMA Buk leh Pu Runa mual mawng zum lam, Sairang kawngchhak kan chang a, (*Sairang kawngchhak a mi kha engtin nge ni ta zel ka hre lo*) vengchhak lamin kan Hall hmun tur, Primary Sikul bul a mi an chang thung a. (*Kha'ng hun lai hnaivai takah khan Vaivakawn Branch YMA atangin Kanan Br. YMA leh Hunthar Br. YMA an indanga, engengemaw inchuhin thubuai an nei deuh ut ut nghe nghe a, keini lam inthen nen chuan in ang lo tak kan ni. {huat thu ah min lo lak sak lo hram sela}*) Tichuan kum thar 1990 atanga YMA Branch thar ding tur chuan kan inbuatsaih chho ta a ni.

Khawvel piantirh ata la awm ngai lo, Chanmari West Branch YMA chu a lo piang ta a, February ni 1,1990 zanah Middle School-ah kan Branch YMA Office Bearer hmasa ber turte chu inthlangin chu'ng kan thlanchhuah te chu:

President : Pu Lianchhuna  
V. President: Pu T Bualzika  
Secretary : Pu Ramzauva  
Asst. Secy : Pu R Lalchhuanawma  
Treasurer : Pu Vanlalsawma  
Fin. Secy : Pu Ramtharngaha  
(*ani hi Chanmari huam chungah a awm tawh*)

Hun a inher chho zel a, mitthi neih nikhuain Darkhuang vuak thin chu Information Mike-a puanin a thlak a, YMA Branch hranga kan awm hnu pawhin "Zualko intirh tawn tur em ni ang?" tih ngaihtuah in Joint committee te kan han thukhawm rap rap a, (*kum 1991 kum laihawl vel niin ka hria*) Jt. Comt. chuan "Mitthi kan neihin veng khat angin awmzui zel ila, zualko intir lovin Information Mike-ah inpuan tawnsak zel ni se" tiin lungual takin thu a passed nghe nghe a. (*tunlai angin telephone la awm hek lo, Mobile phone phe chu ka ha..!!*) Eng thleng nge kan in puan tawn sak tak ka hre lo.

Chanmari Branch YMA-a kan awmho laite kha nimin ang mai la ni mah se, Silver Jubilee, kum 25-na lawm tur hialin kan in puahchah chho chu a ni ta reng mai a, a lunglen thlak zawnga ngaihtuah chuan a ngaihawm ve ta ngawt mai ti raw Pu Valte.....?????

### CWSC

☐ Vawiin chawhnu inkhawm ban (dar 3:00 pm) hian Pu T Bualzika in ah meeting neih tur a ni a. Hei hi committee kohnaah ngaiin hruaitute kim taka kal turin an in hriattir.

☐ Club T-shirt zawrh mek a ni a, leisaktute zawng zawng chungah lawmthu an sawi a, a lei duh tan Pu Malala dawr (K-sect) ah lei theih reng a ni.

### CWSC FOOTBALL

☐ ADFA 3rd Div. Season Opening khelh mekah ni 31.8.2013 khan FC Venghnuai nen inkhelin 1-0 in an chak lo a, ni 4.9.2013 khan Young Dreamers FC Chawlhmun nen khel lehin 2-1 in an vanduai leh a, pre-quarter an lut zo ta lo. Player-te leh team enkawltute inpeknaah committee chuan lawmthu an sawi.

☐ Barak Valley Cement Ltd. chuan ₹ 20,000 lai maiin sponsorship a tihsak a, an lawm hle.

☐ Pu T Rohmingthanga (V-sect) chuan MPL a hman tur chi Football 3 ngawt mai a pe a, an lawm hle.

☐ Pu R Vanlallawma (Telawma), Vanapa sect chuan Football lei nan ₹ 3000 a pe a, an lawm hle.

☐ Player-ten Theory Class an neih nana tangkai tak tur White Board thar tha tak mai petu Pu H Lalmuanpuia (K-sect) chungah committee chuan lawmthu a sawi.

☐ PPP Mode bawlhhlawh paihna man, Local Council-a khawn an dil chu phalsak an ni a, tun thla atang hian hruaitute thahnemngai takin khawn theuh turin an inchah.

☐ Monthly Donation khawn a hun leh tawh a, a khawntute'n a rang lama tifel turin an inhriattir.

☐ MPL khel turin player-te theihtawpin an inbuatsaih mek.


### CWSC VOLLEYBALL

☐ Ni 11.0.2013 (nilaini) atang hian MVA 1st Div Indoor championship Tuikual Indoor Stadium-ah an khel dawn a. Hemi ni hian khelh hnihna ah TNA Volleyball Teaam nen an khel ang. Veng chhung mipuite tawiawm turin an sawm.

☐ Dr L Tochhawngi'n tanpui nan ₹ 5000- a rawn pe a, a chungah an lawm hle.

☐ Volleyball thar tlawm tak maia leitirtu Pu PC Lalhriatpuia chungah lawmthu an sawi.

Lemchan thawnthu ngaihnawm leh tha tak mai 'LALTHANGLIANA' J. Lalthangliana ziah a lo chhuak ta. Synod bookroom- leh a ziaktu hnenah lei theihin a awm e, a man ₹70/-



### ZOFA

☐ CM Running Trophy wawi 11-na a Branch YMA in lawmman pahnihna a dawng chu an lawmpui hle a, Branch aiawh a lam zawng zawngte chungah lawmthu an sawi.

☐ An Asst. Secretary Tv R Lalringgheta chuan Dt 13.9.2013 (zirtawpni) dar 11:00 am hian Chanmari West Presbyterian Biak in ah nupui a nei dawn a, member-te inkhawmvek turin an insawm.

☐ An Treasurer NI Lalnui, damlohna thila zin pawh dam taka a lo haw thuai an beisei.

☐ PIB Programme Serchhip-a nei turin an inbuatsaih mek.

### I FA KHAN A ZIRLAIH HENGTE HI A TLACHHAM EM?

Self-Confident, Imagination, Creativity, Concentration, Memory, Listening Skills, analysis, Speed and Accuracy, Mathematics a hlau em? Aloha hmangin kan lo lanpui ang che. Inrinni (Saturday)-ah chauh Learning Centre, Bazar Bungkawn (Main Centre)-ah Class neihpui an ni. Admission a tih leh theih ta.

Hrechiang duh tan.  
Phone - 2301870 (O)  
9612820756/9862577316 (3-2)